

■ CONVIVENZA

In per tuts e tuts per in

DA FADRINA HOFMANN*

En mia famiglia hai dà dacurt schumellins. Duas poppas ch'èn naschidas dus mais memia baud, ma ch'èn saunas e prontas per conquistar il mund.

Admirond questas creatiras perfetgas na poss jau prest betg pli m'imaginar ch'era mes uffants eran ina giada uschè pitschens ed innocents. Mes uffants èn già entrads en la fasa pubertara. I dat damai mumentos ch'jau lasch encrescher fermamain per ils temps cura che l'unic bassetegn da mes pop u da mia poppa era quel da survegnir sien, nutriment ed amur.

Jau vuleva adina avair uffants. Uffants, in chaun ed in mailer. Quai hai jau survegnì. Dentant aveva jau in maletg fitg idillic da mia vita sco mamma. La realitat è in zic autra. Uffants na sa laschan betg furmar tenor ils agens gavischs, ins po be dar ina direzioni ad els, als sustegnair sin lur via ed als amar senza resalva. Il rest è destin – u forsa era be casualitat.

Mes uffants han blers talents, èn sauns ed intelligents, han umor ed in bun cor. Jau sun terribel superbia dad els. Ma els èn er uschè testards sco lur mamma. «Creppas düras sco la grippa d'Uina», prentenda mes bab. Avair ina ferma voluntad è en sasez insatge positiv. Umans cun



in ferm caracter persequite-schan lur finamiras fin ch'els las cuntanschan. E persunas cun in chau dir restan per il solit fidaivlas a sasezzas. Tenor atgna experientscha poss jau però confermar ch'ina ferma voluntad po era daventar stentusa. Jau poss esser stinada sco in botsch, mes uffants er. Il resultat da questa constellaziun è explosiv. Actualmain sun jau anc la pli ferma en nossa chasada, ma mes descendants han bunas schanzas da ma surpassar.

Cumpromiss èn ina buona chaussa. Cumpromiss èn impurtants per la convivenza. Sin cumpromiss sa basa mintga relaziun che funcziuna a lunga vista e mintga sistem statal stabil. Per umans testards èn cumpromiss dentant ina sfida. I dat situaziuns u temas per ils quals jau na sun betg pronta da far cumpromiss. Guardar pluffers film-ins sin Youtube tutga per exempli latiers. Jau na poss betg chapir ch'ils giuvenils dad oz èn capabels da guardar uras a la lunga sin il

computer co che auters – ils influencers – giogan sezs gieus da computer. Là finescha mia pronteza da far cumpromiss. Insatge tal-main idiotic na vegn betg fatg en nossa chasa. Punct. Jau na fatsch era betg concessiuns sch'i va per pen-sums da matematica, per temps dad ir a durmir u per excess da dultscharias. Er areguard in auter tema mordan mes uffants sin granit tar lur mamma: manzegnas. Era qua han mes dus gnocs disfotuna: Jau als enconusch memia bain, e per il solit vegnan las manzegnas scuvertas vaira svelt. Snegar è inutil.

Tgi che pensa ussa ch'il temp da la crisa da corona saja en chasa Hofmann in temp da guerras e da conflicts, lez sa sbaglia dentant. Gea, i dat mumentos cun sbragim ed i dat era mumentos da frustraziun sch'ins è sfurzà da viver uschè datiers in da l'auter. Normalmain essan nus ina famiglia fitg activa, sper la scola e la lavur tgirain nus noss hobis ed ans scuntrain cun amis. Da passentar 24 uras al di ensemble n'è betg tschigulatta. In avantatg ha nostra malsogna da famiglia dentant: Nossa ferma voluntad alias testardezza: Nus na dain mai si. E: Nus tegnain ensemble cura ch'i daventa critic.

* Fadrina Hofmann è redactura tar la «Südostschweiz» e viva cun sia famiglia a Scuol. Ella è ina da pliras auturas ed auturs da la «Convivenza», ina seria da columnas che cumpara mintga glindesdi en La Quotidiana ed en la «Südostschweiz».